

關愛的故事



悉心教導啟人生

我叫阿文，讀完中二就無讀喇。因為年紀細，學歷低，好難搵到份穩定嘅工。無錢用嗰陣，我就求其搵份工做，一出糧就唔再做。髮型屋、跟車送貨、餐廳侍應.....我乜都做過。

做咗兩年「雙失青年」，我透過社會服務機構嘅外展社工，參加咗一個就業培訓計劃，學習維修工作嘅基本技能，後來仲轉介到一間清潔公司試工。但由於慣咗『夜蒲』，唔慣咁早起身，又驚遲到被老細鬧，所以就索性唔返。

我上司，亦都係我「師父」，佢竟然無放棄我，仲透過社工四處咁搵我，叫我第日一定要返工。我唸住返番工一定會被佢鬧，點知佢好似咩事都無發生過，如常咁教我做嘢。我咁唔爭氣，都仲有人對我不離不棄，我真係要立志改過，重新做人！

自此之後，我無去夜蒲，仲俾心機做嘢，加上師父嘅鼓勵同悉心教導，我考到吊船牌，可以操作吊船清潔大廈外牆，後來仲升咗做高級清潔工，同埋後補管工，老細唔喺度，我仲要負責安排同事嘅工作。

我好多謝社會上嘅「有心人」同社會服務機構，俾我地呢啲徘徊喺校園同社會十字路口嘅青少年一個機會，我都有介紹幾個經歷同我相似嘅朋友，參加呢啲就業培訓計劃，等佢地都可以唔再迷惘，積極做人。

(463 字)